

Ō Taonga Whakarongo

He aratohu hei āwhina i ngā tamariki rātou ko te whānau kia mārama ai,
kia tiaki pai ai i ā rātou taonga whakarongo

Ngā mihi nui i ō taonga whakarongo hōu!!

Mā tēnei pukaiti koe e whakamārama kia pēhea ō taonga whakarongo mō-muri-taringa e whakamahia ai, mō ētahi mea anō mē tūpato hoki ina tiaki i ō taonga whakarongo.

E tūmanakohia ana ka arohaina e koe ō taonga whakarongo hōu!

Ko tēnei pukapuka nā:



Ngā Ihirangi

Kia pēhea ō taonga whakarongo e meinga ai kia haere, kia weto hoki	5
Kia pēhea ō taonga whakarongo e whakamau ai ki tō taringa	6
Te whakarahi oro	10
Ngā pākahiko	11
Te whakahōu i ngā pākahiko	13
Ngā pākahiko tawhito	14
Te tiaki i ō taonga whakarongo	15
Ō taonga whakarongo me ngā pākahiko i waenganui pō	18
Ngā ritenga taringa	19
Te ngongo kirihou	22
Ngā taonga tāpiri mō tō taonga whakarongo	24
Ngā waea	26
Te rorohiko me te taonga whakarongo	26
Te taonga whakarongo me te kararehe mōkai	30
Ētahi mea hira hei maumahara	31
Ētahi kupu akoako hei āwhina	35
He tuhinga	38

He wheako whakaihiihi anō te mau taonga whakarongo. He mea hira tonu tōu mōhio ki te whakamahi, ki te tiaki anō i ō taonga whakarongo. I ngā whārangi e whai ake nei, ka ākona koe e mātou ki te whakamahi i ō taonga whakarongo kia whiwhi i a koe te tino pai. Ka hoatu hoki he mōhio ki te tiaki i ō taonga whakarongo. Kia mahara tonu e rua ngā wāhi hei tiaki, ko te taonga whakarongo me te ritenga taringa, arā, te wāhi kirihou mō roto o tō taringa.

Kia pēhea te taonga whakarongo e meinga ai kia haere, kia weto hoki

Ko te tikanga meinga kia haere, kia weto rānei, kei te āhua o tō taonga whakarongo.

Mā tō tākuta whakarongo e tohu ko ēhea ngā kōrero tohutohu hei whai māu.

Mā te pana i te pana kaitā ki te pū M ka mahi tō taonga whakarongo. Ka weto hoki mā te pana i taua pana kaitā anō ki te pū O.



Tērā rānei

Mā te kati i te popoki pākahiko ka mahi tō taonga whakarongo. Mā te huaki i taua popoki anō ka weto te taonga whakarongo. Mā te pēnei ka wetekia te pākahiko, ā, ka tohungia tōna kaha i te wā kāore i te whakamaua e koe o taonga whakarongo.



Kia pēhea ō taonga whakarongo e whakamau ai ki tō taringa

Kāore pea e tino ngāwari te whakamau i ō taonga whakarongo ina tīmata koe, ā, tērā koe e hiahia kia āwhina mai ō mātua, tō pouako rānei.

1. Kia maumahara ki te weto i tō taonga whakarongo i mua i tō whakamaunga.



2. Āta tiakina kei te whakamaua te taonga whakarongo matau ki tō taringa matau (he tohu whakapiri whero pea kei runga), ko tō mauī hoki ki tō taringa mauī (he tohu whakapiri kikorangi pea kei runga).





3. Meatia te ritenga
taringa ki tōu taringa.

4. Ki te uaua te
meatanga o te
ritenga ki tō
taringa, uia ō mātua,





tō pouako rānei.

5. Ki te mau pai te ritenga,
meatia te taonga whakarongo
ki muri i



tō taringa.




6. Meatia te taonga whakarongo kia mahi.




Te whakarahi oro

He whakarahi oro pea kei tō taonga whakarongo. Ka āhei koe te whakarerekē i te oro o te taonga whakarongo mā te huri i te wīra whakarahi oro. Ki te panaia whakarunga ka rahi ake te oro, ki te panaia whakararo ka heke te oro. Ki te nukuhia e koe te whakarahi oro, āta tiakina ki te whakahokia ki tōna wāhi tika. Tērā pea ka whakakāhoretia e tō tākuta whakarongo te whakarahi oro, kia kore e rerekē te tangi ina pā koe ki te wīra. Ki te mea kua whakakāhoretia, tērā e hurihia e koe te wīra, engari kāore e piki e heke rānei te oro.



Ngā pākahiko



Nā te pākahiko ka mahi tō taonga whakarongo. Nā reira he mea nui tonu kia āta tiakina e koe ngā pākahiko, kia maumahara hoki ki te whakahōu i te wā e tika ana.

I te nuinga o te wā, ka whaikaha te pākahiko mō waenganui i ngā rā e 5 me 15, engari kei te momo taonga whakarongo tēnei. He mea nui tonu kia uia tō tākuta whakarongo mō te roa e kaha ai ngā pākahiko, āhea hoki me whakahōu anō. Kia mau i a koe ō taonga whakarongo ētahi marama torutoru pea, kātahi koe mōhio pai ai ka pēhea te roa e whaikaha ai ngā pākahiko!

Ki te pau haere te kaha o ngā pākahiko, tērā e oro mai tō taonga whakarongo, e haruru rānei anō he 'pūrere' hei whakaoho i a koe. Ko tōna tikanga kua tae ki te wā kia whakahōungia ngā pākahiko. Ki te kore e whakahōungia, ka weto tō taonga whakarongo, ā, kāore e mahi. Kia mahara ki te whakamōhio i tētahi pakeke ina tae ki te wā kia whakahōungia - māna koe e āwhina.



Kia kaha te tiaki ki te kawē haere i ētahi pākahiko tāpiri ki te kura, ki ngā haerenga o te kura rānei, kei pau te kaha o ngā mea kei te whakamahia. He pai tonu kia puritia anō he pākahiko e tō pouako i te kura. Kia mōhio anō hoki koutou ko ō mātua, ko tō pouako ki te rahi o ngā pākahiko, e riro ai i a koe ngā mea tōtika mō tō taonga whakarongo i ngā wā kāore koe i te kura, i te kāinga rānei.

Tuhia te rahi o te pākahiko ki konei: _____

Te whakahōu i ngā pākahiko

Hei whakahōu i te pākahiko i tō taonga whakarongo, huakina te popoki pākahiko ka tango ai i te pākahiko. Whakakapia ki te mea hōu o te pāhi - kia mahara ki te tango i te tohu whakapiri. Ki te kore te popoki pākahiko e pā anō, kāti, hurihia te pākahiko ka whakamātau anō - tērā pea kei te takoto huripoki kē. Ki te kore koe e mōhio ki te huaki i te popoki pākahiko, me kimi āwhina i ō mātua, i tō pouako rānei.



Ngā pākahiko tawhito

Kaua e puritia ngā pākahiko tawhito, kei huia ki ngā mea hōu.
Me maka atu ngā pākahiko tawhito o tō taonga whakarongo.
Hoatu ki ō mātua, tō pouako, tō tākuta whakarongo rānei
- ka mōhio rātou ki te maka tika ai i ngā pākahiko. Kaua
ngā pākahiko tawhito e whakamahia hei taonga tākaro,
kei pākiki ngā kararehe mōkai, ō tēina rānei, nā ka kainga
- kātahi ka tino kino rawa atu!



Te tiaki i ō taonga whakarongo

Ko te mea nui kia maumahara, kia kaua rawa ō taonga whakarongo e tapoko ki te wai, he wāhi hikohiko anō hoki ō rātou.



He pai noa iho te whakamau i a koe i te onepū, heoi kia kaua rawa i a koe e kaukau ana.



Kia kaua rawa anō e whakamau i a koe i te uwhiuwhi, i te kauranga rānei.



He pai noa iho te whakamau i rō marangai kōpatapata - heoi anō i te ua tātā - engari rā ia kei te mau hamarara koe, pōtae marangai rānei hei uhi.

Nō te mea kāore e taea te horoi i ō taonga whakarongo ki te wai, me muku noa ki te pūeru ngohengohe. Ka taea hoki te whakamahi he paraihe ngohengohe iti, he paraihe niho ngohengohe rānei, he mea maroke. Nō te mea rite tonu tō whakamahi i ō taonga whakarongo, ka paruparu anō ōna wāhi katoa. Mā te pūeru, te paraihe rānei e muku kia mā. Ki te kore e tiakina ō taonga whakarongo kia noho mā, tērā e piri te paru ki reira, nāwai ā ka pākaru. Kei tō tākuta whakarongo he tino paraihe mō te taonga whakarongo.



Ki te makere te taonga whakarongo ki te papa, tērā pea ka pākaru, ka mate rānei. He whakaaro pai te mukumuku i runga i te wāhi ngohengohe - pērā i te pūeru i te tēpu.




Ki te mea kua pāngia ō taonga whakarongo e te tino wera, e te haumākū, e te werawera rānei, he pai tonu te whakatakoto ki te 'kete whakamaroke' mō te pō. Ko te mahi a te kete nei, he tango i te mākū i ngā taonga whakarongo. Me ui koutou ko ō mātua ki te tākuta whakarongo mō tēnei kete, mō te whakamahinga anō hoki.



Ō taonga whakarongo me ngā pākahiko i waenganui pō

Me whakatā ō taonga whakarongo me ngā pākahiko i te wā e whakatā hoki ana ko koe. Nā reira me tango ngā taonga whakarongo ina haere koe ki te moe. Hei tiaki kei te tino rite te taonga whakarongo me ngā pākahiko mō āpōpō, huakina te popoki pākahiko kia puare rawa; kāore he tikanga kia tangohia ngā pākahiko. Ki te mea kua pāngia te taonga whakarongo e te haumākū nui pēnei i te werawera, me whakatakoto ki te 'kete whakamaroke' mō te pō. Kia mahara tonu, ki te kore ngā taonga whakarongo e whakamaui e koe mō ngā rangi e rua neke atu, me tango ngā pākahiko.



Ngā ritenga taringa

E mōhio nā koe, i hangaia te ritenga taringa mōu anō - i mahia hoki tēnei e te tākuta whakarongo i te whare haumanu, te hōhipera rānei. He āwhina te ritenga taringa me te ngongo kia tae rawa ki tō taringa ngā oro o te taonga whakarongo. Mehemea kāore he ritenga, kāore hoki e āhei te taonga whakarongo te tuku oro ki tō taringa.



Kia whakahōungia hoki te ritenga taringa i ētahi wā. Kia pēnei hoki nō te mea ka whanake koe ka tipu haere hoki ō taringa - heoi, nō te mea kāore ngā ritenga e tipu tahi me koe, kāore e pai te noho ki ō taringa, nā reira me whakahōu.



He mea nui anō kia pai te noho a te ritenga ki tō taringa. Ki te mamae te whakamau i te ritenga, me kōrero ki ō mātua, tō pouako rānei.



He mea nui tonu hoki kia noho mā ō ritenga taringa. He rerekē te hanga o ēnei i tō ngā taonga whakarongo, kāore hoki he wāhi hikohiko - nā reira kāore he āwangawanga ina mākū. He whakaaro pai te horoi ia wiki i rō wai mahana me te hopi, kia nui ake rānei ngā horoi ki te hohoro ake te nui o te paruparu.

Ka mutu ō ritenga taringa te horoi, he mea nui kia whakamaroke. Kia tino maroke rawa atu i mua i te whakahononga anō ki tō taonga whakarongo. Ka taea a waho te whakamaroke me te pūeru. Me whakamaroke a roto mā te puhupuhi i te wai ki waho o te ngongo. Kua e pupuhi mā tō waha nō te mea he mākū te hau o tō waha, nā reira kāore te ritenga e maroke. Engari, whakamahia he taonga pupuhi ritenga, e pupuhi nei he hau maroke ki te ngongo o te ritenga hei whakamaroke. Ka taea tētahi taonga pupuhi ritenga i tō tākuta whakarongo.



Te ngongo kirihou

Ko te ngongo kirihou tēnei i waenganui i tō taonga whakarongo me te ritenga taringa e tiaki ana kia tae ngā oro ki tō taringa. Nā reira he mea nui te āta tiaki i taua ngongo. Me whakahōu e rua wā pea ki te tau, ki te mea rānei kua mārō, kua poapoa te āhua, kua kore e piko. Kāore e tino pai ngā oro o tō taonga whakarongo rā ngā ngongo mārō, tawhito rānei.



Piko pai noa iho ngā ngongo pai



Me whakahōu ngā ngongo ina mārō, ina poapoa rānei te āhua



Kia haere koutou ko ō mātua ki te tākuta whakarongo kia whakahōungia ai ngā ngongo. Kei a ia te taputapu mō tēnei mahi - kia kore ai e mate ō taonga whakarongo, ō ritenga rānei.

Ngā taonga tāpiri mō tō taonga whakarongo

Tērā pea ka taea tētahi taonga tāpiri te whakamahi ki te taha o tō taonga whakarongo, e pai ai koe ki te whakarongo ina kei tētahi wāhi hoihoi koe, kei tawhiti atu rānei. He wāhi tēnei taonga tāpiri nō te pūnaha e huaina FM. Ko te pūtake o te pūnaha FM he whakatata rawa mai i ngā pūoru o tawhiti, pērā i ngā wā kei tawhiti kē tō pouako. He āwhina anō tēnei i ngā wā e uaua ana te whakarongo nā te hoihoi rawa, pērā i tētahi whare kai, i tētahi hākari huritau, akomanga hoihoi rānei.



Ko te wāhi o te pūnaha FM e hono ana ki raro o tō taonga whakarongo ka huaina ko te kawē reo FM. Ka taea tēnei kawē reo te hono hāngai ki tō taonga whakarongo, ka taea rānei te whakamahi he hononga ā-hiko.



Te taonga taringa me te kawē reo FM

Ka mau i te kawē reo FM ngā oro e tukua ana e te hopuoro FM. Tērā e whakamaua pea te hopuoro nei e tō pouako, e tō matua rānei, tērā e noho noa rānei i runga i te tēpu.

Mā te kawē reo FM ka kawea ngā oro o te hopuoro hāngai mai ki tō taonga whakarongo, whakarere tonu ki tō taringa. Ko te āhua ia kei te kōrero hāngai tonu te pouako ki tō taringa.



Te taonga taringa me te kawē reo FM



Te taonga whakarongo whai hononga ā-hiko, whai kawē reo

Anei ētahi hopuoro FM rerekē
hei tirohanga māu. Kia mahara,
kāore e pēnei te āhua o ngā
hopuoro katoa - tērā pea kua
kitea e koe he momo kāore i te
whakaaturia ki konei.





Ngā waea

Ka āhei anō te whakarongo me te kōrero i te waea i a koe e mau ana i ō taonga whakarongo. Ki te rongo koe i tētahi korowhio, puritia te waea he tikanga anō, nukuhia te waea ki tētahi wāhi rerekē o tō taringa, nā e tika ana kia mutu te korowhio. Kei ētahi taonga whakarongo he tino wāhi e hua nei he 'whiri-waea' (telecoil) kia pai ake ai te rongo mā te waea. Ki te mea kei tō taonga whakarongo te tohu T (mō te telecoil), kāti e huri ki te T, ka kōrero mā te waea. Ka mutu te kōrero mā te waea, whakahokia tō taonga whakarongo ki te tohu M (mō te hopuoro). Ki te kore koe e pēnei, tērā koe ka pōhēhē kāore i te pai te mahi a ō taonga whakarongo, ka rangona noa rānei he rorohū. Mā te whakahoki i te pana ki te tohu M ka pai anō tana mahi.





Ki te whakamahia he waea pūkoro i ō taonga whakarongo e mau ana, tērā e rangona pea he hoihoi iti - heoi ka pēnei mō ētahi waea pūkoro anake. Tērā e puta mai i a koe e noho ana ki te taha o tētahi hoa e whakamahi ana i tana waea pūkoro. Kāore he tikanga kei te mate ō taonga whakarongo - kua e māharahara! Me kōrero ki tō tākuta whakarongo ki te nui te hoihoi i tō waea pūkoro.

Te rorohiko me te taonga whakarongo

Kāore tonu koe e rarua pea ina mau taonga whakarongo ai i a koe e whakamahi ana i te rorohiko. Heoi anō, ki te mea kei te tohu T, MT (telecoil) rānei te pana o ō taonga whakarongo, ka rangona pea e koe he rorohū ina tata tō māhunga ki te mata o te rorohiko. Ehara tēnei i te tohu kei te mate ō taonga whakarongo - whakahokia kautia te pana ki te tohu M, ā, ka mutu te rorohū.





Ki te pai koe ki te whakarongo ki ngā kōpaepae, ki ētahi atu hōtaka rongō rānei o te rorohiko, ka taea te pūnaha Hono Hāngai (Direct Input) te whakamahi, mahue ia te whakamau i ngā taringa kawē rongō (headphones) me te tango i ngā taonga whakarongo. E whakamahia e koe he uua hiko mai i te putanga taringa kawē rongō o te rorohiko ki ō taonga whakarongo. Tikina tēnei uua hiko me te hononga kirihou mō ō taonga whakarongo i tō tākuta whakarongo, māna anō e whakamārama te tikanga whakamahi.

Ngā taonga whakarongo me ngā kararehe mōkai

Ahakoā he tino hoa nōu tō mōkai kurī, ngeru rānei, ehara rawa pea i te tino hoa o ō taonga whakarongo.

I ētahi wā he pāhihi te kurī, te ngeru rānei ki ngā taonga whakarongo - ina koa ki te mea kua mahue e korowhiowhio ana i te tēpu, te tūpapa rānei. Otirā, ki te tino pāhihi, tērā e ngaua, e kainga rānei e ia ō taonga whakarongo. Nā reira, he mea nui tonu kia puritia atu ō taonga whakarongo i ngā mōkai!



Ētahi mea hira hei maumahara

He rorohiko nohinohi nei ō taonga whakarongo, nā reira he mea tino nui te āta tiaki kia pai tonu tā rātou mahi. Hei āwhina i a koe kua hangaia e mātou he rārangi o ngā mea hei maumahara māu:



1. Ko te kai, ko te unu mō tō waha - kāore ia te pākahiko, te taonga whakarongo!

2. Pai noa iho te kauranga, te uwhiuwhi me te kaukau - engari tangohia ō taonga whakarongo nō te mea kia kua rawa rātou e mākū!



3. Pai noa iho te tākarō tahi me ō mōkai - heoi kua e tuku
kia tākarōtia ō mōkai me ō taonga whakarongo, kei kainga!



4. Pai noa iho te noho ki te
taha o te whakamahana,
o te ahi rānei - engari
puritia atu ō taonga
whakarongo i te kaha
o te wera!






5. Pai noa iho mōu te whakamau i ō taonga whakarongo - kāore ia e pai mō ō hoa!


6. Pai noa iho te wetewete i te Leggo, i te panga - heoi anō te taonga whakarongo!





7. Pai noa iho te
puhipuhi i ō makawe,
te whakamahi i
te rehu makawe
- engari tangohia ō
taonga whakarongo!

8. Kia mahara ki te mukumuku i ō taonga
whakarongo ia wiki i te itinga rawa.




Ētahi kupu akoako hei āwhina

I ētahi wā kāore te taonga whakarongo e mahi ki tāu e whakaaro ai. Anei ētahi kupu tohutohu mō ētahi mea hei tirotirohanga mōu, mō ō mātua, mō tō pouako, i mua i te haere ki tō tākuta whakarongo.


Ki te mea kāore he oro i tō taonga whakarongo, me:


- ☆ Hurihia te pana ki te tohu M (mō te hopuoro)
- ☆ Titiro mēnā kei te pā tika ai te poki pākahiko
- ☆ Whakarahia te oro
- ☆ Whakahōunga te pākahiko - āta tiaki kei te tika te hononga
- ☆ Mukua te ritenga taringa kia mā



Ki te korowhio tō taonga whakarongo, me:

- ☆ Muku i te ritenga taringa kia mā, ka whakamau anō me te taonga whakarongo
- ☆ Haere ki tō tākuta kia tirohia tō taringa
- ☆ Tono kia hangaia he ritenga taringa hōu
- ☆ Whakaitia te oro (he rongoā wā poto noa iho tēnei)





Ki te rangona he oro hikohiko/hoihoi, me:

- ☆ Kōrero ki ō mātua, tō pouako rānei kia tirohia wawetia te taonga whakarongo
- ☆ Titiro kei te tohu M (hopuoro) tō taonga whakarongo
- ☆ Whakahōungia te pākahiko - me te tiaki anō kei te tika te hononga

Ki te kore e oti ō raruraru i ēnei kupu tohutohu, me inoi koutou ko ō mātua ki tō tākuta whakarongo, tō tākuta rānei kia āta tirohia ō taonga whakarongo.



People first



E whakapono ana mātou he nui atu
i te hangarau me te rongo ātea te
hanganga o te taonga whakarongo
tino pai rawa atu. Koia mātou i
whakatū ai ko ngā mate o te tangata
kotahi, ko ngā hiahia o te hunga
turi ngā mea tuatahi i tō mātou
whakawhanaketanga i ngā taonga hōu
mō te atawhai i te rongo o te tangata.

Nā te Oticon Foundation te pūtea tautoko